

NAQQIUT 2

Naqqiut 4. oktober 2018-imeersoq taarserpaa

Tunngavigineqartoq

Piginnaatitaaffiit arlallit Inatsisartut inatsisissaattut siunnersuummi saqqummiunneqaqqaartumi Naalakkersuisunit isumagisassaasut naqqiummi matumani kommunalbestyrelsinit isumagineqartussanngortinneqarput. Aammattaaq suliffeqarfiit kommuninit pigineqartut taarsigassarsiassaminnut il.il. qularnaveeqqusinnginnerminni akuersissummik pissarsiniartarnerisa amerlassusiat killiliivigineqarpoq. Tamatuma peqatigisaanik suliffeqarfiit kommuninit pigineqartut taarsigassarsisarnerisa il.il. ersarinnerulernissaat siunniunneqarpoq.

§ 2, imm. 1-imi ”Naalakkersuisunit” allanngortinneqarpoq ”kommunalbestyrelsimit”. Aamma taamaappoq § 2, imm. 2-mut atatillugu, soorlutaaq ”il. il.”-ip kingorna ilanngussisoqartoq. § 2, imm. 3-mi ”Naalakkersuisunit” allanngortinneqarpoq ”kommunalbestyrelsimit”. § 2, imm. 4-mi aalajangersakkap imarisaanut sunniuteqanngitsunik oqaasertat allanngortinneqarput, soorlutaaq immikkoortup naanerani immikkoortoq nutaaq ilanngunneqartoq.

§ 3, imm. 1-imi ”Naalakkersuisut” allanngortinneqarpoq ”kommunalbestyrelsi”-mut. Aammattaaq suliffeqarfiit kommuninit pigineqartut akiliisinnaassusissaata annikinnerpaaffissaanut killiliussaq ilanngunneqarpoq, soorlutaaq aalajangersagaq kinguneqaateqartitsisoqartussanngorlugu allanngortinneqartoq. Aalajangersakkami imm. 2-mi tassani oqaasitigut taamaallaat allannguisoqarpoq. § 3, imm. 3-mi ”Naalakkersuisut” allanngortinneqarpoq ”kommunalbestyrelsi”. § 3, imma. 4 aamma 5 nutaajupput.

Siunnersuummut nassuiaatit

Nassuiaatit nalinginnaasut

1. Aallaqqaasiut

Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat (missingersuutinut naatsorsuutinullu inatsit) ulloq 1. januar 2018 atuutilerpoq.

Pisortat aningaasanik aqutsinerata patajaallisarneratigut nunatta aningaasarnikkut kiffaangissuseqarnerunerup tungaanut ineriartortinnerata nangittumik ingerlanneqarnissaa

Naalakkersuisut inatsisiliornermikkut anguniagaqarnerat Inatsisartut inatsisaanni tunngaviuvoq.

Nunatsinni pisortat ataatsimut aningaasaqarneranni atasinnaassusilimmik aningaasaqarnermik pingaarnertut anguniagaq qulakkeerumallugu, missingersuutitut naatsorsuutinullu inatsit kommunit aningaasanik atorsinnaasaannik maleruagassanik aalajangersakkanik imaqarpoq. Assersuutigalugu missingersuutitut naatsorsuutinullu inatsit taarsigassarsinerit aqunneqarneranni periutsit ilaasa inatsisitigut aalajangersaavigineqarnerannik imaqarpoq.

Kommunit aningaasaqarnikkut politikkip attanneqarsinnaaneranut pitsanngorsaannermut ilapittuisunik kiisalu aatsaat atuisut akiliutaasa il.il. annertussusiat taarsigassarsiani ernianut taarsersuutinullu minnerpaamik aningaasalersuisinnaaneranni kommunit taamaallaat inissianut, inuussutissarsiornermi attaveqaatinullu suliniutinut tunngasunik taarsigassarsisarnerat tamatuma ilaatigut malitsigaa.

Pisortat ingerlataasa nalinginnaasumik ineriartortinneqarnerannut atatillugu pisortat ingerlataasa ilaanni ingerlatat aqqissuunnerat allannngortinneqarsinnaavoq, tassani ingerlatseqatigiiffinnik taakkunungaluunniit assingusunik sulianik tamanna tikillugu kommuninit taakkuluunniit sinnerlugit ataatsimooqatigiiffinnik isumagineqartarsimasunik isumaginnittussanik pilersitsinerit.

Inatsisartut inatsisissaani matumani siunertarinqartoq tassaavoq suliffeqarfiit kommuninit pigineqartut akiitsortarnerannut il.il. atatillugu kommunalbestyrelsit isummernissamut periarfissinneqarnissaat, taamaalilluni suliffeqarfiit taakku tamat oqartussaaqataanerannik tunngaveqarluni nakkutilliisarneq ammasuunissarlu nukittorsarlugit.

Kommunalbestyrelsit suliffeqarfiit kommuninit pigineqartut akiitsornissaat il.il. pillugu isummissatillutik taarsigassarsisarneq pillugu missingersuutitut naatsorsuutinullu inatsimmi maleruagassanut tunuliaqutini isiginiagassat assingi aallaaviatigut ilannguttassavaat.

2. Siunnersuummi immikkoortut pingaarnertit

Suliffeqarfiit kommuninit pigineqartut, kommunit immikkoorlutik ataatsimulluunniit, toqqaannartumik toqqaannangitsumilluunniit aningaasaatit 50 procentii sinnerlugit piginnittuunerisigit, imaluunniit taasisinnaasut 50 procentiinik amerlanerusunik taasisinnaatitaanermikkut, kommunalbestyrelsimit akuerineqaqqaarnatik inissianik, atuarfinnik, aqqusinernik tamanut atugassianik il. il. suliffeqarfiup allanut pisussaaffinnut qularnaveeqqusiisitsisinnaannginnerat. Tamatumani ilanngullugit pineqarput isumaqatigiissutit attartorsinnaannginnerat – imaluunniit taakkuninnga attartortitsisinnaannginnerat imaluunniit ukiunit pingasunit sivilisunerusumik inissianik

attartorlutilluunniit isumaqatigiissiorluni attartortitsisinnaannginnerat siunnersuutigineqarpoq. Suliffeqarfiit taamaattut akiitsornissaat il.il. pisuni amerlasuuni tamat oqartussaaqataanerannik tunngaveqarluni aalajangiiffigisassanngorlugit kommunalbestyrelsimut saqqummiunneqartarnissaat maleruagassatigut qulakkeerneqassaaq.

Suliffeqarfik kommuninit pigineqartoq annikinnerpamik 25 procentimik akiliisinnaassuseqarpat kommunalbestyrelsi taamaallaat § 2, imm. 1 naapertorlugu akuersisinnaavoq, tamatumani ilanngullugit naatsorsorneqassallutik akiitsut akuersissummik qinnuteqarnermut ilanngunneqartussat

Suliffeqarfik kommuninit pigineqartoq annikinnerpamik 25 procentimik akiliisinnaassuseqarpat kommunalbestyrelsi taamaallaat akuersisinnaassasoq siunnersuutigineqarpoq, tamatumani ilanngullugit naatsorsorneqassallutik akiitsut akuersissummik qinnuteqarnermut ilanngunneqartussat. Aammattaaq pigisat il.il. qularnaveeqqusiunneqartut taamaallaat sanaartukkat, pisiat imaluunniit inissianik nutaanik, atuarfinnik aqqusinernulluunniit tamanut atugassanut sanaartukkanut taarsigassarsianut il.il. qularnaveeqqusiunneqarnerat taamaallaat akuersissutigineqarsinnaasoq siunnersuutigineqarpoq. Taamattaaq isumaqatigiissut suliffeqarfiup kommuninit pigineqartup pineqartumi suliassanik ingerlatsisinnaaneranut pisariaqartuussaaq.

Tamatuma saniatigut atuisut akiliutaat pisortallu aningaasartuutaasa annikillissutaasa minnerpaamik sanaartukkamut, pisinermut, sananermut il.il. aningaasartuutitut minnerpaamik matussusiisinaanerat toqqammavigineqartassasoq siunnersuutigineqarpoq. Sorlutaaq aningaasaliinerit pineqartut ungasissumut sammisumik aningaasaqarnermillu politikimik patajaallisitsisumik ikorfartuisuunissaq piumasaqaataasoq, tamatuma ilaatigut pisortat pisussaaffii piffissap ingerlanerani akiliisinnaassutsip ineriartorneranit sukkanerusumik ineriartunnginnissaat piumasaqaataavoq.

Akuersissutit kommuninit nalunaarutigineqartut nalunaarsorsimaffiat kommunit naatsorsuutaannut ilanngunneqassaaq.

3. Pisortanut aningaasatigut allaffissornikkullu kinguneqaatit

Siunnersuut qinnuteqaatit tigineqartut suliarineqarnissaannut kommunit allaffissornikkut sulisussanik aningaasanillu atuinissaannik nassataqassaaq. Qanoq annertutigisumik atuinissaq maannangaq missingerneqarsinnaanngilaq.

Pisortaqaarfinni aningaasaqarnikkut aqutsilluarnerunissanik siunnersuutip aqqutissieqataasinnaanera naatsorsuutigineqarpoq, tamatumani inuiaqatigiinnut sunniutissai pitsaasuunissaat naatsorsuutigineqarluni.

4. Namminersorlutik inuussutissarsiortunut aningaasatigut allaffissornikkullu kinguneqaatit

Siunnersuut namminersorlutik inuussutissarsiortunut pitsaanngitsumik kinguneqassangatinneqanngilaq.

5. Avatangiisinut, pinngortitamut inuiaqatigiillu peqqissuunerannut kinguneqaatit

Siunnersuut avatangiisinut, pinngortitamut inuiaqatigiillu peqqissusaannut kinguneqassangatinneqanngilaq.

6. Innuttaasunut kinguneqaatit

Siunnersuut innuttaasunut pitsaasumik kinguneqassangatinneqarpoq, pisortammi pitsaanerusumik aningaasaqarnermik aqutsinerisigut inuiaqatigiinnut tamanut iluaqutaasumik aningaasat pitsaanerusumik tulleriiarneqartarneranik qulakkeerissammat, tassani innuttaasut ilanngullugit.

Siunnersuut innuttaasunut allaffissornikkut kinguneqassanngilaq.

7. Kinguneqaatit pingaarutilit allat

Siunnersuut allanik pingaarutilinnik kinguneqassangatinneqanngilaq.

8. oqartussanik kattuffinnillu il.il. tusarniaaneq.

Siunnersuut ulloq 18. Juni 2018, ulloq 16. Juli 2018 tusarniaanermut akissuteqarfissatut aalajangiullugu Namminersorlutik Oqartussani naalackersuisoqarfinnut tamanut, KANUNUPE-mut, Sulisitsisunut, SIK-mut NUSUKA-mullu kiisalu kommuninut tusarniutigineqarpoq. Tusarniaanerup nalaani ulloq 20. Juni 2018 tusarniaatigineqarpoq allanngortitaq nassiunneqarpoq. Oqaaseqaataasinnaasut siunnersuummut allanngortitamut attuumasuupput.

Tamatuma saniatigut piffissami tassani siunnersuut tusarniaavimmiippoq.

Tusarniaanerup qaangiunnerani tusarniaavigineqartut tulliuttut akissutaat tiguneqarput: Naalackersuisut siulittaasuata Naalackersuisoqarfia, Kommune Kujalleq, Sulisitsisut, Inuussutissarsiornermut Nukissiuuteqarnermullu Naalackersuisoqarfik, Ilinniartitaanermut, Kulturimut, Ilageeqarnermullu Naalackersuisoqarfik, Pinngortitamut Avatangiisinullu Naalackersuisoqarfik, Akileraartarnermut Aqutsisoqarfik kiisalu Peqqinnissamut Ilisimatusarnermullu Naalackersuisoqarfik.

Tulliuttuni tusarniaavigineqartut oqaatigisaat nalinginnaasumik allatatut takusassiarineqarput, Naalakkersusullu oqaatigiumasaat *uingasumik* allallugit takusassiarineqarlutik.

Naalakkersuisut Siulittaasuata Naalakkersuisoqarfia

Naalakkersuisut Siulittaasuata Naalakkersuisoqarfiata oqaaseq 'suliffeqarfik pisortanit pigineqartoq' oqaatsimik 'suliffeqarfik kommuninit pigineqartoq'-mik taarserneqassasoq siunnersuutigaa, soorluttaaq allanneqarneranut aaqiissutit ataasiakkaat ilanngullugit siunnersuutigineqartut. Tassunga atatillugu inatsisissatut siunnersuummi oqaatsit atorineqartut, siunnersuutip suliffeqarfinnut kommuninit pigineqartunut taamaallaat tunngatinneqarnera eqqarsaatigalugu paatsuugalersitsisinnaasoq kiisalu inatsisissatut siunnersuutip iluserisamisut iluseqarluni inatsisissatut siunnersuutip Inatsisartuni suliarineqarnissaani suliffeqarfinnik namminersorlutik oqartussanit pigineqartunik oqallinnermik pilersitsisinnaasoq Naalakkersuisut Siulittaasuata Naalakkersuisoqarfia erseqqissaavoq.

Siunnersuutit ilanngunneqarput.

Kommune Kujalleq (KK)

Kommunit Namminersorlutillu Oqartussat inuiaqatigiit aningaasaqarnerisa ineriartornerannut akisussaaqataanerat KK-p isumaqatigaa, taamattaarlu pisortatut oqartussaasut akisussaassuseqarnermik tassangga sanioqqutsinnginnissaat kommunip isumaqatigaa.

Naalakkersuisut iluarisimaarpaat, tamatumuuna kommunip siunnersuutip anguniagaanik tapersersuina.

Kommunit suliassat inuussutissarsiortunit isumagineqarnerat naapertuunnerpaajunera pissutigalugu isumagisassanngortitsisinnaanerisa killilersorneqarnissaa KK-p naapertuuttutut isiginngilaa, tamatumanili nalinginnaasumik oqartussat isumagisassaat aningaasanut inatsit aqqutigalugu kommunillu missingersuutaasigut aningaasalersorneqartut annikitsuinnarmik ilaatinneqarput. Pisortat ingerlataasa, tassani oqartussatut suliat pinnagit imaluunniit annikitsuinnaat ilanngullugit, niuerneramik toqqammaveqarluni illersorneqarsinnaasumik ingerlanneqarsinnaanerant inuiaqatigiit aningaasaqarnerannut iluaqutsiisoq KK isumaqarpoq, assersuutigalugu inissianik attartortitsineq, tassanilu namminersortut inissianik ingerlatsinerat annertusiartorpoq, peqatigisaanillu pisortat inissianik pilersuinerat annikilliartorluni. Taamatut ineriartorneq pisortat aningaasalersuinermit tatineqarnerannik annikillisaassasoq KK isumaqarpoq.

Kommunit ingerlataasa illersorneqarsinnaasumik niuerneramik toqqammaveqartumik ingerlanneqarsinnaanerannik killiliinissamik siunnersuut siunertaqanngilaq.

Taarsigassarsinermi missingersuutinut naatsorsuusiornermilu inatsimmi malittarisassat

aamma kommunit suliasanik ingerlatassanngortitsinerminni aamma atuunnissaasa qulakkeernissaa siunertaavoq. Taamaasilluni siunnersuut inissianik attartortitsisanermik killiliisutut isigineqanngilaq.

Inissiat pisortanit aningaasalersorneqarlutik attartortinneqartarnerisa niuerneramik toqqammaveqarluni ingerlanneqalernerat inissiaatit iluarsartuunneqartarnerisa pitsaanerulersitsinerannik, ineqarnermullu akiliutit inissiat aserfallatsaalineqarsimaneranut oqimaaqatigiinnerulernerannik nassataqassasoq kommunip ilanngullugu oqaatigaa. Suliffeqarfiit pisortanit pigineqartut aningaasalersuisinnaaneramik killiliinerit iluaqutissanik piviusunngortitsisinnaaneq ajornakusoornerulersissavaa.

Tamanna tunuliaqutaralugu siunnersuutip akuersissutigineqannginnissaa KK kammattuutigaa.

Suliat ingerlatassanngortinneqarneranni iluaqutissat piviusunngortinneqarsinnaaneranut periarfissanik killiliiniarneq siunertarineqanngilaq. Naalackersuisullu aningaasaliinerit/suliniutit pineqartunut tunngatillugu ataatsimut aningaasaliinissamik pisariaqartitanik nalileereernikkut qularnaveeqqusiinernut, attartornernut attartortitsinernulluunniit akuersissummik tunniussisinnaapput. Tamatuma saniatigut oqaatigineqassaaq, Inissianik attartortitsisarneq pillugu Inatsisartut inatsisaat nr. 2, 12. maj 2005-imeersumi § 28-mi erserpoq, Namminersornerullutik Oqartussat kommunellu ilaqutariinnut arlalinnut illuutaanni inissianik attartortitsinermit isertitat tamakkiisut sukkulluunniit annertussusilerneqarnerini, najugaqatigiiffiup aningaasartuutitik tamanik akiliisinnaanissaa periarfissinneqassaaq, matumani ilanngullugit aningaasaaliissutinit iluanaarutitut illumik piginnittumut akiliutitut aningaasartuutit aamma ingerlatsinermut atatillugu aningaasartuutit, matumani ilanngullugit allaffissornikkut aqutsinermut akiliutit, aserortersarnermik pinaveersaartitsinermut akiliutit, aamma akiliutissatut illuartitallu aalajangikkat. Siunnersuutip matuma tamanna allannngortinngilaq.

Sulisitsisut (GE)

Sulisitsisut aallaqqaasiullugu suliffeqarfimmik ingerlatsineq, kommunit Naalackersuisullu piginnittut suliffeqarfik sinnerlugu aalajangiisartillugit ajornartorsiornartuussasoq oqaatigaat, suliffeqarfiummi ingerlanneqarnerani siulersuisut Naalackersuisullu akornanni soqutigisat imminnut aporaattut pilersinnaammata, Naalackersuisummi suliffeqarfinnik pisortanit pigineqartuni pisiortornerit, qularnaveeqqusiinerit kiisalu illuutitik atortunillu attartornerit akuersissutigisartussaammattigit.

Naalackersuisut § 3 naapertorlugu taamaallaat immikkorluinnaq pisuni aalajangiisinnaanerat sulisitsisut tassunga ilanngullugu erseqqissaatigaat.

Suut toqqammavigalugit pisinissamut, qularnaveeqqusiinissamut imaluunniit illuutit atortullu ilaannik attartorsinnaanermi siunnersuut pingaarnertut sinaakkusiivoq, soorlutaaq inatsisit

allat suliffeqarfiup suiaanut kiffaanngissuseqarneranullu piunasaqaatinik aamma nassataqartartut.

Sulisitsisut siunnersuutip nassuiaatai, tassani Namminersorlutik Oqartussat namminneq suliffeqarfiutiminnik piginnittuunertik aqqutigalugu nakkutilliinerannik allaqqasut innersuussutigalugit, tamatuma Naalakkersuisut kommunit missingersuutitut naatsorsuutinullu inatsit naapertorlugu kommunit piginnittuunermikkut taarsigassarsisinaanermut malittarisassanut tunuliaqutaasunut tunngatillugu kommunit isumagisassaminnik isumaginnissinaanerannik Naalakkersuisut tatiginninnginnerannik tamanna peqatigisaanik paasisariaqarnerarpaat.

Siunnersuut kommunit nammineq suliffeqarfiutiminnik/ingerlatseqatigiiffimminnik aqutsisinaanerannut Naalakkersuisut tatiginninnginnerannik ersersitsisoq Sulisitsisut isumaqarput. Sulisitsisuttaaq siunnersuut suliffeqarfiit pisortanit pigineqartut ingerlanneqarneranut sunniuteqassoq isumaqarput, taamaalillunilu tamanna attuumassuteqanginnissamik periutsimut akerliussalluni.

Siunnersuummik kommunit namminneq aningaasaqarnermi iliuusaasa ilaannut tulluurtunik akisussaassuseqartunillu sinaakkusiisoqarpoq. Tamanna – aqutsinermi inatsisit allat assigalugit – inatsisip tunngavigisaanut tatiginninnginnertut isigineqassanngilaq.

Naalakkersuisut tamatuma saniatigut isumaqatiginngilaat, toqqaannartumik attuumassuteqartussaanginnermut siunnersuut akerliusoq.

Naggasiullugulu Naalakkersuisut pisortat suliffeqarfiutaasa taarsigassarsisarnerinik malinnaanissamik kissaateqarnerannut Sulisitsisut paasinninnertik oqaatigiumavaat, tamannali siunnersuutigineqartumit allaanerusumik pisariaqartoq isumaqarlutik.

Tamakku tunuliaqutaralugit siunnersuut itigartitsissutigineqartariaqartoq Sulisitsisut isumaqarput.

Naalakkersuisut isumaqarput, siunnersuut tusarniaanerup kingorna allannguuteqartoqareernerani, naammaginartumik tusarniaavigisat isumaliutersuutaat akuersaaraat, taamaattumik Naalakkersuisut siunnersuut saqqummiutissallugu aalajangerpaat.

Inuussutissarsiornermut Nukissiuuteqarnermullu Naalakkersuisoqarfik Inuussutissarsiornermut Nukissiuuteqarnermullu Naalakkersuisoqarfik (ISIIN) qulequttami pisortat suliffeqarfiutaasa pineqarnerat, taamaattoq oqaasertani taamaallaat suliffeqarfiit kommuninit kommunilluunniit ataatsimooqatigiiffiinit pigineqarnerat maluginiarpaat.

Pisariaqanngitsumik paatsuungasoqannginnissaa pinngitsoorniarlugu, siunnersuut tamakkerlugu oqaatsit atorpeqartut 'suliffeqarfuit kommuninit pigineqartut'ngorlugu allanngortinneqarpoq.

ISIIN-ip ilanngullugu massakkut kommunit pisuni ikittuinnarni suliffeqarfinnik pilersitsillutilluunniit namminersortuni peqataasinnaanerat maluginiarpaa, tassani soorlu ingerlatseqatigiiffinnik. Pilersitsinerlu immikkut inatsisit immikkuullarissumilluunniit toqqammaveqarluni aatsaat pisinnaavoq. Ingerlatseqatigiiffiit taakku ingerlatseqatigiiffiit pillugit inatsisitigut malittarisassiorneqarsimanerat taamaalillutillu inatsisit naapertorlugit immikkuullarissutut ingerlanissaat ilimagisariaqartoq ISIIN isumaqarpoq, tassani taarsigassarsinerit il. il. ilanngullugit.

Kommunit ingerlatseqatigiiffiutaat, nalinginnaasumik kommuninut pisinnaatitsissut tunngavigalugu pilersinneqartarput, immikkut inatsisit tunngaviginagit. Taamaattumik Naalackersuisut ilisimanngilaat, assersuutigalugu Nuup Bussi A/S imaluunniit Nuuk City Development A/S immikkut inatsisinik tunngaveqarluni pilersinneqarsimanissaat.

Ingerlatseqatigiiffiit taakku iliuuseqarnissamut periarfissaasa Naalackersuisut akuerseqqaartarnissaasigut piumasaqaateqarnikkut nalorninartunngortinneqarnerat ISIIN-ip ataatsimut isigalugu pissusissamisuumngissoraa. ISIIN-ip isumaa naapertorlugu ingerlatseqatigiiffiit, ingerlatseqatigiiffiit pillugit inatsimmut ilaasut taassuma piumasaqaatai naapertorlugit iliuuseqarsinnaasariaqarput.

Siunnersuummik ingerlatseqatigiiffiit pillugit inatsit allanngortinniarneqanngilaq. Aalajangersaernerit siunnersuummi matumani siunnersuutinut assingusumik siunertallit aamma qallunaat inatsisaanni nassaarineqarsinnaapput, tamatumani aamma qallunaat kalaallillu ingerlatseqatigiiffiit pillugit inatsisaasa akornanni assigiissuterpasuit apeqqutaatinngit. Kommunit taarsigassarsisarnerat kiisalu qularnaveeqqutinik nalunaaruteqarneq il.il. Økonomi- og Indenrigsministerip Nalunaarutaani 17. december 2013-imeersumi § 14-imut innersuussisoqarpoq.

Killiliissutaasinnaasut kommunit aqunneqarnerat pillugu inatsit aqcutigalugu malittarisassiorneqarsinnaanerit ISIIN-ip inassutigaa, taamaaliornikkut nakkutilliinissaq qulakkeerneqarluni. Taamaaliornikkuttaaq oqartussaaneq atuinernilu akisussaaneq qularnarunnaarsinneqassapput.

Pisiortornernut, qularnaveeqqusiinernut illuutilluunniit atortullu ilaasa attartornerinut isumaqatigiissutinik akuersisarnissamik piumasaqaat missingersuutit naatsorsuutillu pillugit inatsisip ilaatigut ingerlatsinermut aningaasartuutit taarsigassarsinikkut

assigisaatigulluunniit aningaasalersorneqannginnissaat pillugu patajaatsumik aningaasaqarnikkut aqutsinissamik tunuliaqutaanik ikorfartuisuuvoq. Kingorna nakkutilliineq naammattumik tamakkuninnga qulakkeerisinnaanngitsoq Naalakkersuisut isumaqarput.

Ineqarnermut Attaveqaatigiinnermullu Naalakkersuisoqarfik

Ineqarnermut Attaveqaatigiinnermullu Naalakkersuisoqarfiup siunnersuummi §§ 1, imm. 2 aamma 2, imm. 2 innersuussutigalugit Naalakkersuisut assersuutigalugu suliffeqarfiit pisortanit pigineqartut attartornissamik isumaqatigiissutaannik akuersisalissappata, tamanna suliffeqarfinnut Naalakkersuisunullu allaffissornerunermik kinguneqassasoq oqaatigaa.

Tassunga assingusumik siusinnerusukkut akissutigineqartoq innersuussutigineqarpoq.

DBI-p tamatuma pisortat pitsaannerusumik aningaasaqarnikkut aqutsinerannik aningaasanillu pitsaannerusumik pingaarnersiuiinermik qulakkeerinissaa siunnersuummi allaqqasoq maluginiarpaa. Taamaattoq sukumiisumik qanoq tamanna pitsanngoriartitsineranut ilapittuissanersoq, massakkullu suliffeqarfiit aalajangernerisa annertussusaat apeqqutaatinnagu suliffeqarfiit aalajangiisinnaassusiannut Naalakkersuisut akuliusinnaanerannik pisinnaanngortitsisunik ajornartorsiutinik piosoqarnersoq siunnersuummi allassimangilaq.

Siunnersuut pisortat aningaasaqarnikkut aqutsinerannut pitsanngoriartitseqataallunilu pisiortortarnermi, qularnaveeqquusiisarnermi kiisalu illuutit atortullu ilaasa attartorneqarnerinut periutsinik aalajangersaanikkut aningaasanik pingaarnersiuiinermik qulakkeerinneqataassaq. Pisinissaq imaluunniit qularnaveeqquusiinissamik isumaqatigiissuteqarnissaq attartornissarluunniit sioqqullugu Naalakkersuisut akuersissuteqartussaanerata piumasaqaatigineqarneratigut, aningaasaliinerit ataatsimut aningaasaliinissamat pisariaqartitsineranut naapertuuttuunerat qulakkeerneqassaaq.

Missingersuutinut naatsorsuusiornermullu inatsisip, ilaatigut taarsigassarsinerit ilaannut periutsit inatsisitigut aalajangersarneqarnerannik imaqartup akuersissutigineqarneratigut, periutsit assigiit aamma kommunit aqqiissuussaanerup kinguneranik suliassanik ingerlatseqatigiiffinnut suliffeqarfinnulluunniit assingusunut suliassanik isumagisassanngortitsinermi periutsit assigiit atuunnissaasa qulakkeerneqarnissaa pisariaqartutut isigineqarpoq, peqatigisaanillu kommunit suliassanik ingerlatassanngortitsinerani missingersuutinut naatsorsuusiornermilu periuserineqartut sunniutaarutsinneqarsinnaanerat pinngitsoortinneqarnissaa peqatigisaanik qulakkeerniarneqarpoq.

DBI-p ilanngullugu siunnersuummi §§ 2, imm. 2 aamma 3, imm. 1-imut innersuussineq tamakkiisuunngitsoq ilanngullugu innersuussutigaa, tamannalu DBI-p naliliinera naapertorlugu pisunik tamanik sukumiisumik nalilersuisarnissamik kinguneqassaaq. Taamaammat allattukkat tamakkiisunngortinneqarnissaat kaammattuutigineqarpoq.

Pissutsit suut inatsimmi maleruagassiuunneqarnerat allattorniarneqarsimavoq. "Il.il." taamaallaat sanaartukkanut allassimasunut assingusunut atuutsinneqarpoq.

DBI-p siunnersuummi § 2, imm. 3 innersuussutigalugu aalajangersakkap siunnersuummi § 2, imm. 2 assigalugu taanna suliffeqarfiit aalajangiisarnerannut akuliunnertut ittoq, tamannalu illuatungeriit tamarmik 'allaffissornerulernerannik' nassataqartussaq eqqarsaatigeqqinneqartariaqartoq naggasiullugu oqaatigaa.

Siusinnerusukkut tamanna pillugu akissut innersuussutigineqarpoq.

Ilinniartitaanermut, Kulturimut, Ilageeqarnermullu Naalackersuisoqarfik, Pinngortitamut Avatangiisinullu Naalackersuisoqarfik, Akileraartarnermut Aqutsisoqarfik kiisalu Peqqissutsimut Ilisimatusarnermullu Naalackersuisoqarfik siunnersuummut oqaatigisassaqaanngillat.

Siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Aalajangersagaq Inatsisartut inatsisaata atuuffissaanik aalajangersaavoq. Inatsisartut inatsisaat ataatsimooqatigiilluni ingerlatanut tamanut, soqutigisaqatigiiffinnut, piginneqatigiiffinnut, aktiaateqarluni ingerlatseqatigiiffinnut, piginneqataassuteqarluni ingerlatseqatigiiffinnut, suliffeqarfinnut imminut pigisunut, suliffeqarfinnulluunniit ilutsinut assingusunut kommuninit peqataaffigineqartunut atuunera aallaaviuvoq.

Imm. 2-mut

Taaguut suliffeqarfiit kommuninit pigineqartut, suliffeqarfinnut kommunit aalajangiisuusumik sunniuteqarfigisaannut atorneqartarpoq. Suliffeqarfinni kommunit peqataaffigisaanni piginneqataassutaat assigiinngiiaarsinnaapput – tamakkiisumik aktianik piginnittuunermi, amerlanerussuteqarluni aktiaateqartutut kiisalu ikinnerussuteqarluni aktiaateqartutut.

Kommunit ataatsimut immikkoorlutilluunniit toqqaannartumik toqqaannangitsumilluunniit, suliffeqarfinni aningaasaliissutit 50 procentiinik piginnittuunerat, imaluunniit taasisinnaassutsit 50 procentiinik amerlanerusunik taasisinnaanerat Inatsisartut inatsisaata atortinneqarnissaanut tungavissaatinneqarpoq.

§ 2-mut

Imm. 1-imut

Suliffeqarfik kommuninit pigineqartoq kommunalbestyrelsimi akuersissummik pigisaqarnani illunik, inissianik, aqqusinernik assigisaanilluunniit suliffeqarfiup allamut pisussaaffiit qularnaveeqqusiisnaangilaq, allaffinnik, atuarfinnik, ulluunerani paaqqinniffinnik il.il. attartorsinnaangilaq attartortitsisnaananiluunniit, imaluunniit ukiuni pingasunit sivilisunerusumik inissianik attartorluniluunniit attartortitsisnaangilaq.

Aalajangersakkami tamakkiisumik sanaartukkat allattugaatigineqanngillat, taamaasilluni `il.il.` allattorsimaffimmiittut sanaartukkat allassimasunut assingusut ilanngullugit pineqarsinnaallutik.

Imm. 2-mut

Kommunalbestyrelsimit akuersissummik pigisaqarani attartornissamik attartortitsinissamilluunniit kommuninit pigineqartut suliffeqarfiit isumaqatigiissuteqarsinnaanngitsut aalajangersakkami aalajangersarneqarpoq tamatumani allaffinnik, atuarfinnik ulluunerani paaqqinnittarfiit, ulloq unnuarlu paaqqinnittarfiit, pisortat aqquserngi, umiarsualiviit mittarfiit assigisaallu pineqartillugit. Suliffeqarfiup isumaqatigiissutitut taamaattunut ukiumoortumik aningaasartuutaasa 5 mio. kr.-t sinnissanngippatigit kommunalbestyrelsimit akuersissummik pissarsiniarnissaq pisariaqassanngilaq. Aningaasat amerlassusiisa nalunaarsorneqarneranni isumaqatigiissutit piffissami nutaamik isumaqatigiissuteqarnermi atorunnaarsimanngitsut aammalu isumaqatigiissut nutaaq ilanngunneqassapput.

Aalajangersakkami tamakkiisumik aamma allassimanngilaq sanaartukkat suut pineqarnerisut, aammalu `il. il.`-mik allassimanera aamma allattugaatigineqartut pineqartunut assingusut pineqarput.

Imm. 3-mut

Suliffeqarfik kommuninit pigineqartoq kommunalbestyrelsimit akuersissummik pigisaqarnani ukiuni pingasunit sivisunerusumik inissianik attartorluniluunniit attartortitsisinnaanngilaq.

Inissiap attartornerata attartortinneqarnerataluunniit ukiunit pingasunit sivisuninngorlugu sivitsorneqarneranik nassataqartussamik kommunalbestyrelsimit akuersissuteqarnani aamma isumaqatigiissuteqartoqarsinnaanngilaq.

Imm. 4-mut

Taamattaq aalajangersakkat Naalakkersuisut aalajangersakkat naapertorlugit akuersissutitut qinnuteqaatit imarisaat pillugit erseqqinnerusunik maleruagassiorsinnaanerannik periarfissiipput, tassunga ilanngullugit qinnuteqaatit qaqugukkut inuiaqatigiit aningaasaqarnerannut kinguneqaatinut taakkulu imarisaanik naliliutinik ilaqartinneqartarnissaannik aalajangersaaneq.

Suliniutip inuiaqatigiinni aningaasaqarnikkut kingunissanik nalilersorneqarnera ersarissumik takussutissinneqassaaq, tamatuma tamakkiisumik aalajangiiniarnerni tapertatut toqqammavisseeqataasinnaassalluni. Inuiaqatigiinni aningaasaqarnikkut kingunissanik nalilersuinernik saqqummiussinermi Aningaasaqarnermut Nunamilu Namminermi Pissutsinut Naalakkersuisoqarfimmit ilitsersuut 2014-imeersoq innersuussutigineqarpoq.

Piginnittuunermut

Piginnittuunermi periutsumik akuerineqartumik qinnuteqaatinut ilanngussisoqartarnissaa pillugu Naalakkersuisut erseqqinnerusunik aamma maleruagassiorsinnaapput.

Piginnittuunermi periuseq ilaatigut imarissavai piginnittut piginnittuunerminnik qanoq ingerlatsiniarnerat aammalu suliffeqarfimmut qanoq sunniuteqarnissaaq pillugu nassuiaammik imaqassaaq.

§ 3-mut

Imm. 1-imut

Suliffeqarfik kommunimit pigineqartoq annikinnerpaamik 25 procentimik akiliisinnaassuseqarpat suliffeqarfik kommunimit pigineqartoq allamut akiligassaqalernermigut illutanik, inissianik, aqqusinernik assigisaannillu qularnaveeqqusiisinaanissamut kommunalbestyrelsimit taamaallaat akuerineqarsinnaasoq aalajangersakkami imm. 1-imi aalajangersarneqarpoq, tamatumani ilanngullugit naatsorsorneqassallutik akiitsut akuersissummik qinnuteqarnermut ilanngunneqartussat.

Akiliisinnaassuseq akiliisinnaassutsip annertussusiatut paasineqassaaq, tassalu: (Namineq aningaasaatit akiligassanik tamarmiusunik agguarlugit) 100-eriaammik amerlillugit).

Akiliisinnaassutsip annertussusia annertutillugu piffissani ajornartorsiorfiusuni imaluunniit aningaasaqarnikkut annaasaqarfiusuni suliffeqarfiup piareersimanissaa pitsaanerussaaq.

Aammattaaq suliffeqarfiup kommuninit pigineqartup illuutinik, inissianik, aqqusinernik il.il. suliffeqarfiup allamut pisussaaffiinit qularnaveeqqusiisinaanermut kommunalbestyrelsip taamaallaat akuersisinaanera aalajangersakkap imm. 1-iani aalajangersarneqarpoq, tassani qularnaveeqqusiinerup il. il. sanaartornerup, pisinerup nutaanilluunniit illuliornernut, allaffiit illutaannik sanaartornernut, atuarfinnut, meeqqerivinnut, ulloq unnuarlu angerlarsimaffinnut, umiarsualivinnut, mittarfinnut il. il. aningaasalersorneqarneranut atorneqarneranni

Imm. 2-mut

Akuersissuteqarsinnaanermi atuisut akiliutaasa, pisortat aningaasartuutaasa annikilliat, imaluunniit kinguneqaataasumik pisortat isertitsissuteqarnerussutaasa minnerpaamik sanaartornermut, pisinermut, sananermut il. il. attuumasunut aningaasartuutitut aningaasaliissutigineqarsinnaanerat tunngavissaatinneqarpoq.

Tamatuma nassatarisaanik qularnaveeqqusikkanut taarsigassarsianut aningaasartuutit atuisunit tamakkiisumik nammaneqassapput, akileraartartuniunngitsoq, imaluunniit aningaasaliinermi aningaasartuutitut minnerpaamik naapertuuttunik pisortat aningaasartuutaasa apparnerisigut imaluunniit kinguneqaataasumik isertitaqarnerussutinik illuatungilerneqarnerat.

Taamattaaq suliniutini pineqartuni aningaasaliinerit ungasissumik isigisumik aningaasaqarnikkut attassisinnaanermik ikorfartuisuunissaannik aalajangersaakkatigut maleruagassiortoqarpoq, taamaaliornermilu pisortat aningaasaqarneranni oqimaaqatigiittoqarluniluunniit sinneqartooruteqarnissamik tamanna paasineqassaaq, tassunga ilanngullugit akileraarutigut isertikkumaagassatut ilimagisat, tassani Qallunaat Nunaannit ataatsimoortumik tapiissutit il.il. ilanngullugit pisortat aningaasartuutaannik matusisinnaaneri ilanngullugit. Isertitat aningaasartuutillu ukiut tamaviisa oqimaaqatigiittarnissaat piunasaqaatigineqanngilaq, taakkuli piffissap ingerlanerani oqimaaqatigiissapput, taamaaliornikkut pisortat pisussaaffii akiliisinnaassutsimit sukkanerusumik annertusiartoqqunagit.

Imm. 3-mut

Aalajangersakkami imm. 2-mi aalajangersarneqarpoq suliffeqarfiup pisortanit pigineqartup allaffinnik, atuarfinnik, ulluuneranik paaqinniffinnik attartortitsinissamik attortornissamilluunniit taamaallaat kommunalbestyrelsi akuersisinnaasoq, isumaqatigiissut taamaattoq pisortat suliffeqarfiutaata pineqartumi suliaminik ingerlatsinissaanut pisariaqarpat. Assersuutigalugu suliffeqarfik sulisut inissiaannik attartornissamik pisariaqartitsisinnaavoq, taamaattoq ulluunerani paaqinniffimmiunngitsoq. Tamanna aamma ukiunit pingasut sivisunerusumik inissianik attartornermik attartortitsinermulluunniit isumaqatigiissuteqarnerni atuuppoq.

Imm. 4-mut

Akiitsorsinnaanermut atatillugu apeqqummik innuttaasut suliniaqatigiiffiillu misissuinissamut oqallinnissamullu periarfissinneqarnissaa siunertaralugu suliffeqarfiit kommuninit pigineqartut qularnaveeqquisiisnaanerannut imaluunniit attartortitsinissamut isumaqatigiissuteqarsinnaanerannut il.il. kommunalbestyrelsit akuersissutaannut nalunaarsukkamik kommunit naatsorsuutaannut ilanngussisoqartassasoq siunnersuutigineqarpoq.

Imm. 5-imut

Nalunaarsukkat imm. 4-mi taaneqartut imarisassaas pillugit Naalakkersuisut erseqqinnerusumik maleruagassiornissamut, tassungalu ilanngullugu akuersissutit qaqugukkut nalunaarsukkanit peerneqassanersut aalajangersaasinnaanissamut Naalakkersuisut piginnaatinneqassasut siunnersuutigineqarpoq.

§ 4-mut

Inatsisartut inatsisaat ulloq 1. januar 2019-imi atuutilissasoq siunnersuutigineqarpoq.